

四庫全書

集部

欽定四庫全書

御定全唐詩錄卷四十二

盧綸

綸字允言河中蒲人天寶避亂客鄱陽大厯初數  
舉進士不第元載取其文以進補閩鄉尉累遷監  
察御史輒稱疾去坐與王縉善久不調建中初為  
昭應令渾瑊鎮河中辟判官累遷檢校戶部郎中  
嘗朝京師舅韋渠牟表其才得召見帝有所作輒

使賡和異日問渠半綸與李益何在答曰綸從渾  
瑊在河中驛召之會卒大歷十才子俱工五言詩  
綸辭情健麗為尤工

古體詩

送吉中孚校書歸楚州舊山

青袍芸閣郎談笑揖侯王舊錄藏雲穴新詩滿帝鄉名  
高閑不得到處人爭識誰知冰雪顏已雜風塵色此去  
復如何東臯岐路多藉茅臨紫陌回首憶滄波年來倦

蕭索但說淮南樂並檝湖上遊連檣月中泊沿溜入閭  
門千燈夜市喧喜逢隣舍伴遙語問鄉園下淮風自急  
樹杪分郊邑送客隨岸行離人出帆立漁村遶水田澹  
浦隔晴烟欲就林中醉先期石上眠林昏天未曙但向  
雲邊去暗入無路山心知有花處登高日轉明下望見  
春城洞裏草空長塚邊人自耕寥寥行異境過盡千峰  
影雲色凝古壇泉聲落寒井仙成不可期多別自堪悲  
為問桃源客何人見亂時

臘日觀咸寧王部曲娑勒擒豹歌

山頭曈曈日將出山下獵圍照初日前林有獸未識名  
將軍促騎無人聲潛形踈伏草不動雙鷗轉旋羣雅鳴  
陰方質子才三十譯語受詞蕃語揖捨鞍解甲疾如風  
人忽虎蹲獸人立歛然扼額批其頤爪牙委地涎淋漓  
既蘇復吼拗仍怒果叶英謀生致之拖自深叢目如電  
萬夫失容千馬戰傳呼賀拜聲相連殺氣騰陵陰滿川  
始知縛虎如縛鼠敗寇降羌生眼前祝爾嘉詞爾無苦

獻爾將隨犀象舞苑中流水禁中山期爾攬搏開天顏  
非熊之兆慶無極願紀雄名傳百蠻

宴席賦得姚美人搗箏歌

出簾仍有鈿箏隨見罷翻令恨識遲微收皓腕纏紅袖  
深遏朱絃低翠眉忽然高張應繁節玉指迴旋若飛雪  
鳳簫龍管寂不喧繡幕紗窻儼秋月有時輕弄和郎歌  
慢處聲遲情更多已愁紅臉能佯醉又恐朱門難再過  
昭陽伴裡最聰明出到人間纔長成遙知禁曲難翻處

猶自君王說小名

栖霞寺隋文帝馬腦盞歌

天宮寶器隋朝物鎖在金函比金骨開函捧之光乃發  
阿修羅王掌中月五雲如拳輕復濃昔曾喫酒今藏龍  
規形環影相透徹亂雪繁花千萬重可憐貞質無今古  
可歎隋陵一坏土宮中艷女滿宮春得親此寶能幾人  
一留寒殿殿將壞唯有幽光通隙塵山中老僧眉似雪  
忍死相傳保高鑄

送張侍郎還蜀歌

秦家御史漢家郎親專兩印征殊方功成走馬朝天子  
伏檻談邊若流水曉離仙署趨紫微夜接高儒讀青史  
瀘南五將望君還願以天書示百蠻曲棧重江初過雨  
前旌後騎不同山迎車拜舞多耆老舊卒新營遍青草  
塞口雲生火候遲烟中鶴唳軍行早黃花川下水交橫  
遠映孤霞蜀國晴笳竹筍長椒瘴起荔枝花發杜鵑鳴  
回首岷峩半天黑傳觴接膝何由得空令豪士仰威名

無復貧交恃顏色垂楊不動雨紛紛錦帳胡瓶爭送君  
須臾醉起簫笳發空見雙旌入塞雲

近體詩

皇帝感詞

天衣五鳳彩御馬六龍文雨露清馳道風雷翊上軍高  
旂花外轉行漏樂前聞時見金鞭舉空中指瑞雲

卧病書懷

苦心三十載白首遇艱難舊地成孤客全家賴釣竿貌

衰緣藥盡起晚為山寒老病今如此無人更問看

泊揚子江岸

山映南徐暮千帆入古津魚驚出浦火月照渡江人清  
鏡催雙鬢滄波寄一身空憐莎草色長接故園春

題興善寺後池

隔窓棲白鳥似與鏡湖鄰月照何年樹花逢幾度人岸  
莎青有路苔徑綠無塵永願容居止僧中老此身

藍溪期蕭道士採藥不至

春風生百草幾處木苗香人遠花空落溪深日復長病  
多知樂性老近憶仙方青節何由見三山桂自芳

春日灞亭同苗員外寄庾侍御

坐見春雲暮無因報所思川平人去遠日暖雁飛遲對  
酒山長在看花鬢自衰誰堪登灞岸還作異鄉悲

夜中得循州趙司馬侍郎書因寄回使

瘴海寄雙魚中宵達我居兩行燈下淚一紙嶺南書地  
說炎蒸極人稱老病餘殷勤報賈傳莫共酒杯疎

赴池州拜覲舅氏留上考功郎中舅

孤賤易蹉跎其如酷似何  
衰榮同族少生長外家多  
別國桑榆在沾衣血淚和  
應憐失行雁霜霰寄烟波

送韓都護還邊

好勇知名早爭雄上將間  
戰多春入塞獵慣夜燒山  
陣合龍蛇動軍移草木閒  
今來部曲盡白首過蕭關

送劉判官赴豐州

銜杯吹急管滿眼起風沙  
大漠山沈雪長城草發花  
策

行須恥戰寇在莫言家余亦祈勲者如何別左車

送從叔程歸西川幕

千山冰雪晴山靜錦花明羣鶴棲蓮府諸戎拜柳營浪  
依巴字息風入蜀關清豈念在貧巷竹林鳴鳥聲

送顏推官遊銀夏謁韓大夫

叢叢叫寒笛滿眼塞山青才子樽前畫將軍石上銘獵  
聲雲外響戰血雨中腥苦樂從來事因君一涕零

送從姪滁州覲省

愛爾似龍媒翩翩千里迴書從外氏學竹自晉時栽擁  
棹逢鷗舞憑闌見雨來上堂多慶樂不醉莫停杯

送從舅成都丞廣歸蜀

褒谷通岷嶺青冥此路深晚程椒瘴熱野飯荔枝陰古  
郡三刀夜春橋萬里心惟應對楊柳暫醉卓家琴

送李端

故關衰草遍離別自堪悲路出寒雲外人歸暮雪時少  
孤為客早多難識君遲掩淚空相向風塵何處期

題崔端公園林

上士愛清輝，開門向翠微。  
抱琴看鶴去，枕石待雲歸。  
野坐苔生席，高眠竹掛衣。  
舊山東望遠，惆悵暮花飛。

山中詠古木

高林已蕭索，夜雨復秋風。  
墜葉鳴藜竹，斜根擁斷蓬。  
半侵山影裏，長在水聲中。  
此地何人到，雲門去未通。

從軍行

二十在邊城，軍中得勇名。  
卷旗收敗馬，占磧擁殘兵。  
覆

陣鳥鳶起燒山草木明塞間思遠獵師老厭分營雪嶺  
無人跡水河足雁聲李陵甘此沒惆悵漢公卿

晚到盤屋耆老家

老翁曾舊識相引出柴門苦話別時事因尋溪上村數  
年何處客近日幾家存冒雨看禾黍逢人憶子孫亂藤  
穿井口流水到籬根惆悵不堪住空山月又昏

過李尊師院

城闕望烟霞常悲仙路賒寧知樵子逕得到葛洪家犬

吠松間月人行洞裏花留詩千載鶴送客五雲車訪世  
山空在觀碁日未斜不知塵俗士誰解種胡麻

和常舍人晚秋集賢院即事十二韻寄贈江南徐

薛二侍郎

綸閣九華前森沈綺仗連洞門開旭日清禁肅秋天霜  
滿朝容備鐘餘漏唱傳搖璫陪羽扇端弁入爐煙麟筆  
刪金篆龍綃薦玉編汲書荀勗定漢史蔡邕專御竹潛  
通筍宮池暗瀉泉亂聚縈弱蕙墜葉灑枯蓮列署齊遊

日重江並謫年登封思議草侍講憶同筵  
滄海風濤廣  
黝山瘴雨偏惟應絨上寶贈遠一呈妍

早春遊樊川野店却寄李端校書崔峒補闕司空  
曙主簿耿湜拾遺

白水遍溝塍青山對杜陵  
晴明人望鶴曠野鹿隨僧  
古柳連巢折荒堤帶草崩  
陰橋全覆雪瀑溜半垂冰  
鬪鼠搖松影遊龜落石層  
韶光偏不待衰敗巧相仍  
桂樹曾爭折龍門幾共登  
琴師阮校尉詩和柳吳興  
舐筆求書

扇張屏看畫蠅卜鄰空遂約問卦獨無徵投足經危路  
收才遇直繩守農窮自固行藥病何能掩帙蓬蒿晚臨  
川景氣澄颯然成一叟誰更慕騫騰

逢南中使因寄嶺外故人

見說南來處蒼梧接桂林過秋天更暖近海日長陰巴  
路緣雲出蠻鄉入洞深信迴人自老夢到月應沈碧水  
通春色青山寄遠心矣方難久客莫使鬢毛侵

送鮑中丞赴太原

分路引鳴騶喧喧似隴頭暫移西掖望全解北門憂專  
幕臨都護分曹制督郵積冰營不下盛雪獵方休白草  
連氈帳黃雲擁戍樓今朝送旌旆一減魯儒羞

仲秋望華清宮中樹因以成詠

可憐雲木藪滿禁碧濛濛色潤靈泉近陰清輦路通玉  
壇標八柱金井識雙桐交映凝寒露相和起夜風數枝  
盤石上幾葉落雲中燕拂宜秋霽蟬鳴覺晝空翠屏更  
隱見珠綴共玲瓏雷雨生成早樵蘇禁令雄野藤高助

綠仙果迴呈紅惆悵繚垣暮茲山聞暗蛩

長安春望

東風吹雨過青山却望千門草色閒家在夢中何日到  
春來江上幾人還川原繚繞浮雲外宮闕參差落照間  
誰念為儒逢世難獨將衰鬢客秦關

晚次鄂州

雲開遠見漢陽城猶是孤帆一日程估客晝眠知浪靜  
舟人夜語覺潮生三湘愁鬢逢秋色萬里歸心對月明

舊業已隨征戰盡更堪江上鼓鼙聲

夜投豐德寺謁海上人

夜半中峰有磬聲偶逢樵者問山名上方月曉聞僧語  
下界林疎見客行野鶴巢邊松最老毒龍潛處水偏清  
願得遠公知姓字焚香洗鉢過浮生

秋中過獨孤郊居

閒園過水到郊居共引家童拾野蔬高樹夕陽連古巷  
菊花梨葉滿荒渠秋山近處行過寺夜雨寒時起讀書

帝里諸親別來久豈知王粲愛樵漁

得耿漳司法書因叙長安故友零落兵部苗員外  
發秘書省李校書端相次傾逝潞府崔功曹峒  
長林司空丞曙俱謫遠方余以搖落之時對書  
增歎因呈河中鄭倉曹暢叅軍昆季

鬢似衰蓬心似灰驚悲相集老相催故友九泉留語別  
逐臣千里寄書來塵容帶病何堪問淚眼逢秋不喜開  
幸接野居宜屣步冀君清夜一申哀

春日卧病示趙季黃

病中饒淚眼常昏聞說花開亦閉門  
語少漸知琴思苦卧多惟覺鳥聲喧  
黃埃滿市圖書賤黑霧連山虎豹尊  
今日支離顧形影向君凡在幾重恩

洛陽早春憶吉中孚校書司空曙主簿因寄清江  
上人

值迴逢高駐馬頻雪晴閒看洛陽春  
鶯聲報遠同芳信柳色邀歡似故人  
酒貌昔將花共艷髻毛今與草爭新

年來百事皆無緒  
惟與湯師結淨因

訓李端野寺病居見寄

野寺鍾昏山正陰  
亂藤高竹水聲深  
田夫就餉還依草  
野雉驚飛不過林  
齋沐暫思同靜室  
清羸已覺助禪心  
寂寞日長相問疾  
料君惟取古方尋

訓暢當尋嵩嶽麻道士見寄

聞逐樵夫閒看棋  
忽逢人世是秦時  
開雲種玉嫌山淺  
渡海傳書怪鶴遲  
陰洞石幢微有字  
古壇松樹半無枝

煩君遠寄青囊錄願得相從一問師

酬趙少尹戲示諸姪元陽等因以見贈

八龍三虎儼成行瓊樹花開鶴翼張且請同觀舞鸚鵡  
何須竟哂食檳榔歸時每愛懷朱橘戲處常聞佩紫囊  
謬入院家逢慶樂竹林因得奉壺觴

同趙進馬元陽春日登長春宮古城望河中因寄

鄭損倉曹

城頭春靄曉濛濛指望關橋滿袖風雲騎閒嘶宮柳外

玉人愁立草花中  
鐘分寺路山光綠  
河繞軍州日氣紅

跡忝

闕

方戀賞此時離恨與君同

早春歸齋屋舊居却寄耿拾遺漳李校書端

野日初晴麥隴分  
竹園村巷鹿成羣  
幾家廢井生新草  
一樹繁花對古墳  
引水忽驚冰滿澗  
向田空見石和雲  
可憐芳歲青山裏  
惟有松枝好寄君

至德中途中書事却寄李儋

亂離無處不傷情  
況復看碑對古城  
路遠寒山人獨去

月臨秋水雁空驚  
顏衰重喜歸鄉國  
身賤多慙問姓名  
今日主人還共醉  
應憐世故一儒生

送李尚書郎君昆季侍從歸覲滑州

鳳雛聯翼美王孫  
綵服戎裝擬塞垣  
金鼎對筵調野膳  
玉鞭齊騎引行軒  
冰河一曲旌旗滿  
墨詔千封雨露繁  
更說務農將罷戰  
敢持歌訟慶晨昏

送內弟韋宗仁歸信州覲省

常嗟外族弟兄稀  
轉覺心孤是送歸  
醉掩壺觴人有泪

夢驚波浪日無輝  
烹魚綠岸烟迷草  
摘橘青溪露濕衣  
聞說江樓長卷慢  
幾回風起望胡威

春詞

北苑羅裙帶塵衢  
錦繡鞋醉眠芳樹下  
半被落花埋  
和張僕射塞下曲

林暗草驚風將軍夜引弓  
平明尋白羽沒在石稜中  
月黑鴈飛高單于夜遁迹  
欲將輕騎逐大雪滿弓刀

天長久詞

臺殿雲涼風日微  
君王初賜六宮衣  
樓船泛罷歸猶早  
行遣才人鬪射飛

古艷詩

自拈裙帶結同心  
暖處偏多香氣深  
愛捉狂夫問閒事  
不知歌舞用黃金

贈別李紛

頭白乘驢懸布囊  
一迴言別淚千行  
兒孫滿眼無歸處  
惟到樽前似故鄉

題伯夷廟

中條山下黃壘石壘作夷齊廟裏神落葉滿塔塵滿座  
不知澆酒是何人

過玉貞公主影殿

夕照臨窓起暗塵青松繞殿不知春君看白髮誦經者  
半是宮中歌舞人

裴給事宅白牡丹

長安豪貴惜春殘爭翫街西紫牡丹別有玉盤承露冷

無人起就月中看

春日登樓

花正濃時人正愁  
逢花却欲替花羞  
年來笑伴皆歸去  
今日晴明獨上樓

司空曙

曙字文明廣平人能詩為大歷十才子之一登進士第從韋臯於劍南貞元中為水部郎中終虞部徐獻忠曰文明詩氣候清華感賞至到誦之口吻

調利情意觸發可謂風人之度矣

古體詩

早春遊望

東風春未足試望秦城曲  
青草狀寒蕪黃花似秋菊  
壯將歡共去老與悲相逐  
獨作遊社人暮過威輦宿

殘鶯百轉歌同王員外  
耿拾遺吉中孚李端遊慈  
恩各賦一物

殘鶯一何怨百轉相尋續  
始辨下將高稍分長復促  
緜

蠻巧狀語機節終如曲  
堊客賞應遲幽僧聞詎足禪齋  
深樹夏陰清零落空餘三兩聲  
金谷箏中傳不出山陽  
笛裏寫難成憶昨亂啼無遠近  
晴宮曉色偏相引送暖  
初隨柳色來辭芳暗逐花枝盡  
歌殘鶯歌殘鶯悠然萬  
感生謝朓羈懷方一聽何郎閒吟本多情  
乃知衆鳥非  
儔比暮噪朝鳴倦人耳共愛奇音那可親  
年年出谷待  
新春此時斷絕為君惜  
明日玄蟬催髮白

長林令衛象錫絲結歌

一作  
李嶠

主人瑀盤盤素絲寒女眷眷墨子悲乃言假使錫為之  
八珍重沓失顏色手援玉筋不敢持始狀芙蓉新出水  
仰坼重衣傾萬蕊又如合歡交亂枝紅茸向暮花參差  
吳蠶絡繹抽尚絕細縷纖毫看欲滅雪髮羞垂倭墮鬟  
繡囊畏並茱萸結我愛此絲巧妙絕世間無為君作歌

陳座隅

近體詩

公子行

纏臂繡綸巾貂裘窄稱身射禽風助箭驟馬雪飛塵金  
埒爭開道香車為駐輪翩翩不知處應是霍家親

喜外弟盧綸訪宿

靜夜四無隣荒居舊業貧雨中黃葉樹燈下白頭人以  
我獨沈久媿君相訪頻平生有深意况是蔡家親

江園書事寄盧綸

種柳南江邊閉門三四年俗人那勝竹凡鳥不如蟬嗜  
酒漸思渴讀書多欲眠平生故交在白首遠相憐

獨遊寄衛長林

草綠春陽動遲遲澤畔遊  
戀花同野蝶愛水劇江鷗  
身外唯須醉人間盡是愁  
那知鳴玉者不羨賣瓜侯

雲陽館與韓紳宿別

故人江海別幾度隔山川  
乍見翻疑夢相悲各問年  
孤燈寒照雨深竹暗浮烟  
更有明朝恨離杯惜共傳

送郎士元使君赴郢州

使君持節去雲水滿前程  
楚寺多連竹江檣遠映城  
登

樓向月望賽廟傍山行若動思鄉咏應貽謝步兵

送史申之峽州

峽口巴江水無風浪亦翻蕪葭新有雁雲雨不離猿行  
客思鄉遠愁人賴酒昏檀郎好聯句莫滯謝家門

送柳震歸蜀

白日雙流靜西看蜀國春桐花能乳烏竹節競祠神蹇  
步徒相望先鞭不可親知從江僕射登榻更何人

送曹桐椅

青春三十餘衆藝盡無如中散詩傳畫將軍扇賣書楚  
田寒下雁江日暖多魚惆悵空相送歡遊自此踈

送流人

聞說南中事悲君重竄身山村楓子鬼江廟石郎神童  
稚留荒宅圖書托故人青門好風景為爾一沾巾

田家

田家喜雨足鄰老相招攜泉溢溝塍壤麥高桑柘低呼  
兒催放犢邀客待烹雞搔首蓬門下如將軒冕齊

望水

高原晴見水，楚色靄相和。  
野極空如雪，天遙不辨波。  
永無人迹到，獨有鳥行過。  
況在蒼茫外，殘陽照更多。

新蟬

今朝蟬忽鳴，羈客若為情。  
漸覺一年謝，能令萬感生。  
微風初滿樹，落月稍沈城。  
為問同懷者，淒涼聽幾聲。

立秋日

律變新秋至，蕭條自此初。  
花酣蓮報謝，葉墜柳呈澹。

日非雲映清風似雨餘卷簾涼暗度迎扇暑先除草靜  
多翻燕波澄乍露魚今朝散騎省作賦興何如

晦日益州北池陪宴

臨泛從公日仙舟翠幕張七橋通碧沼雙樹接花塘玉  
燭收寒氣金波隱夕光野聞歌管思水靜綺羅香遊騎  
縈林遠飛橈截岸長郊源懷灞澹陂漾寫江潢常侍傳  
花詔偏裨問羽觴豈令南峴首千載播餘芳

和耿拾遺元日觀早朝

元日爭朝闕奔流若會溟路塵和薄霧騎火接低星漏  
促雙魚鑰車喧百子鈴冕旒當翠殿幢戟滿彤庭表歲  
方編瑞乘春即宥刑諸侯陳禹玉司歷獻堯蓂壽酒三  
觴退簫韶九奏停太陽開物象沛澤及生靈南陌祥光  
紫東方曉氣青自憐揚子賤歸草太玄經

南原望漢宮

荒原空有漢宮名衰草茫茫雉堞平連雁下時秋水在  
行人過盡暮烟生西陵歌吹何年絕南陌登臨此日情

故事悠悠不可問寒禽野水自縱橫

過盧秦卿舊居

五柳茅茨楚國賢  
桔槔蔬圃水涓涓  
黃花寒後難逢蝶  
紅葉晴來忽有蟬  
韓康助採君臣藥  
支遁同看內外篇  
為問潛夫空著論  
何如侍從賦甘泉

余九月中吳山登望是日天晴暄紅

樹中忽聞蟬聲  
因憶盧句不虛

題曠上人院

閉門不出自焚香  
擁褐看山歲月長  
雨後綠苔生石井

秋來黃葉遍繩床身閒何處無真性年老曾言隱故鄉  
更說本師同學在幾時攜手見衡陽

酬李端校書見贈

綠槐垂穗乳烏飛忽憶山中獨未歸青鏡流年看髮變  
白雲芳草與心違乍逢酒客春遊慣久別林僧夜坐稀  
昨日聞君到城闕莫將簪弁勝荷衣

贈衡岳隱禪師

擁褐安居南岳頭白雲高寺見衡州石牕湖水搖寒月

楓樹猿聲報夜秋  
講席舊逢沙鳥至  
梵經初向竺僧求  
自知身老將傳法  
因下人間逐此遊

酬張芬赦後見贈

紫鳳朝銜五色書  
陽春忽報網羅除  
已將心變寒灰後  
豈料光生腐草餘  
建水風烟收客淚  
杜陵花竹夢郊居  
勞君故有詩人贈  
欲報瓊瑤恨不如

長安曉望寄程補闕

迢遞山河擁帝京  
參差宮殿接雲平  
風吹曉漏經長樂

柳帶晴烟出禁城，天近笙歌臨路發。日高車馬隔塵行，  
獨有淺才甘未達。多慙名在魯諸生。

一作包何詩，惟末二句有異。何曰：自

憐久在諸生列，未得金閨籍姓名。

### 早夏寄元校書

獨遊野徑送芳菲，高竹林居接翠微。綠岸草深蟲入徧，  
青藜花盡蝶來稀。珠荷薦果香寒簟，玉柄搖風滿夏衣。  
蓬輩永無車馬到，更當齋夜憶玄暉。

### 閒園即事寄陳公

欲就東林寄一身尚憐兒女未成人柴門客去殘陽在  
藥圃蟲喧秋雨頻近水方同梅市隱曝衣多笑阮家貧  
深山蘭若何時到羨與閒雲作四隣

送曲山人衡州

白石先生眉髮光已分紺雪飲紅漿衣巾半染烟霞氣  
語笑兼和藥草香茅洞玉聲流暗水衡山碧色映朝陽  
千年城郭如相問華表峩峩有夜霜

晚思

蛩吟窓下月草濕堦前露晚景淒我衣秋風入庭樹

金陵懷古

輦路江楓暗宮庭野草春傷心庾開府老作北朝臣

別盧秦卿

知有前期在難分此夜中無將故人酒不及石尤風

別盧綸

御覽詩作曙別綸綸集作綸別曙當以御覽為正

有月多同賞無秋不共悲如何與君別又是菊黃時

雜興

月沒遼城暗出師雙龍金角曉天悲黃塵滿目隨風散  
不認將軍燕尾旗

江村即事

罷釣歸來不繫舡江邨月落正堪眠縱然一夜風吹去  
只在蘆花淺水邊

過長林湖西酒家

湖草青青三兩家門前桃杏一般花遷人到處惟求醉  
聞說漁翁有酒賒

峽口送友人

峽口花飛欲盡春天涯去住淚沾巾  
來時萬里同為客今日翻成送故人

耿漳

漳字洪源河東人登寶應元年進士第官右拾遺  
工詩與錢起盧綸諸人齊名號大厯十才子

計敏夫云漳詩有家貧僮僕慢官罷友朋疎世多  
傳之又云唐詩人最重行卷雍陶首篇上裴度漳

行卷首篇上第五琦或指為二子邪正雖然方琦未  
有譽時上詩亦何足多怪

徐獻忠云漳詩不深琢削而風格自勝蓋生有高  
性而寡夙學者也

近體詩

早朝

鐘鼓餘聲裏千官向紫微  
冒寒人語少乘月燭來稀  
清漏聞馳道輕霞映瑣闈  
猶看嘶馬處未啟掖垣扉

春日即事

數畝東臯宅，青春獨屏居。家貧僮僕慢，官罷友朋疎。強  
飲沽來酒，羞看讀了書。閒花更滿地，惆悵復何如。

廢慶寶寺

一作司空曙

黃葉前朝寺，無僧寒殿開。池晴龜出曝，松暝鶴飛迴。古  
砌碑橫草，陰廊畫雜苔。禪宮亦銷歇，塵世轉堪哀。

贈苗員外

為郎日賦詩，小謝少年時。業繼儒門後，心多道者期。曉

迴長樂殿新出永明祠行樂西園莫春風動柳絲

贈嚴維

許詢清論重寂寞住山陰野客投寒寺閒門傍古林海  
田秋熟早湖水夜漁深世上窮通理誰能奈此心

贈朗公

來自西天竺持經奉紫微年深梵語變行苦俗流歸月  
上安禪久苔生出院稀梁間有馴鴿不去為忘機

贈張將軍

寥落邊城暮重門返照間  
鼓鞞經雨暗士馬過秋閒  
慣守臨邊郡曾營近海山  
關西舊業在夜夜夢中還

奉送蔣尚書兼御史大夫東都留守

副相威名重春卿禮樂崇  
錫圭仍拜下分命遂居東  
高旆翻秋日清鏡引細風  
蟬稀金谷樹草徧德陽宮  
教用儒門儉兵依武庫  
雄誰云千載後周召獨為公

上裴行軍中丞

蕭關掃定虎狼羣閉閣層城白日曛  
櫪上驂駟嘶鼓角

門前老將識風雲，旌旗四面寒山映。  
絲管千家靜夜聞，更想他時看竹帛。  
功成不獨霍將軍。

奉和李觀察登河中白樓

城上高樓飛鳥齊，從公一遂躡丹梯。  
黃河曲盡流天外，白日輪傾落海西。  
玉樹九重常在夢，雲衢一望杳如迷。  
何心更和陽春奏，况復秋風聞戰鼙。

朝下寄韓舍人

侍臣鳴珮出西曹，鸞殿分階翊綵旄。  
瑞氣迴浮青玉案。

日華遙上赤霜袍  
花間焰焰雲旗合  
鳥外亭亭露掌高  
肯念萬年芳樹裏  
隨風一葉在蓬蒿

送友人遊江南

遠別悠悠白髮新  
江潭何處是通津  
潮聲偏懼初來客  
海味惟甘久住人  
漠漠烟光前浦晚  
青青草色定山春  
汀洲更有南迴雁  
亂起聯翩北向秦

拜新月

一作李端詩

開簾見新月  
便即下階拜  
細語人不聞  
北風吹裙帶

秋日

返照入閭巷愁來誰共語  
古道無人行秋風動禾黍

李端

端趙州人李嘉祐之姪大歷五年進士從駙馬郭  
曖遊後移疾江南仕至杭州司馬

古體詩

古別離

水國葉黃時洞庭霜落夜行舟  
問商賈宿在楓林下此

地送君還茫茫似夢間後期知幾日前路轉多山巫峽  
通湘浦迢迢隔雲雨天晴見海檣日落聞津鼓人老自  
多愁水深難急流清宵歌一曲白首對汀洲

野亭三韻送錢員外

野菊開欲稀寒泉流漸淺幽人步林後歎此年華晚倚  
杖送行雲尋思故山遠

留別柳中庸

惆悵流水時蕭條背城路離人出古亭嘶馬入寒樹江

南正風波相逢在何處

冬夜與故友聚送吉校書

途窮別則怨何必天涯去共作出門人不見歸鄉路慙  
勤執杯酒望望送親故月色入閒軒風聲落高樹雲霄  
望且遠齒髮行應暮九日泣黃花三秋悲白露君行過  
洛陽莫向青山度

歸山招王達

日長原野靜杖策步幽巘雉雉麥苗陰蝶飛溪草晚我

生好閒放此去殊未返自是君不來非關故山遠

適谷口元贊善所居

入谷訪君來秋泉已堪涉林間人獨坐月下出相接重  
露濕蒼苔明燈照黃葉故交一不見素髮何稠疊

近體詩

巫山高和皇甫拾遺

巫山十二峰皆在碧虛中迴合雲藏日霏微雨帶風猿  
聲寒渡水樹色暮連空愁向高唐望清秋見楚宮

紀事  
云蜀

路有飛泉亭詩板百餘篇薛能嘗過此悉去諸板惟留端此篇

春遊樂

柘彈連錢馬銀鈎倭墮鬟摘桑春陌上踏草夕陽間意  
合辭先露心誠貌却閒明朝若相憶雲雨出巫山

宴伊東岸

晴洲無遠近一樹一潭春芳草留歸騎朱櫻擲舞人空  
花對酒落小翠隔林新竟日皆攜手何由遇此辰

雲際中峰居喜見苗發

自得中峰住深林亦閉關經秋無客到入夜有僧還暗  
澗泉聲小荒村樹影閒高窓不可望星月滿空山

晚次巴陵

雪後柳條新巴陵城下人烹魚邀水客載酒奠山神雲  
去低斑竹波迴動白蘋不堪逢楚老日暮正江春

宿洞庭

白水連天暮洪波帶日流風高雲夢夕月滿洞庭秋沙  
上漁人火煙中賈客舟西園與南浦萬里共悠悠

茂陵山行陪金部韋員外

宿雨朝來歇空山  
天氣清盤雲雙鶴  
下隔水一蟬鳴古  
道黃花落平蕪赤  
燒生茂陵雖有病  
猶得伴君行

聞吉中孚還俗因而有此贈

聞道華陽客儒衣  
謁紫微舊山連藥  
賣孤鶴帶雲歸柳  
市名猶在桃源夢  
已稀還家見鷗鳥  
應愧背船飛

宿華陽洞寄元稱

花洞晚陰陰仙壇  
隔杏林漱泉春谷  
冷擣藥夜窓深石

上開仙酌松間對玉琴  
戴家溪北住雪後去相尋

送耿拾遺漳江外括圖書

驅傳草連天回風滿樹蟬將過  
夫子宅亦問孝廉船漢  
史收三篋周詩採百篇  
別君終有淚不是怨流年

送鄭侍御赴洪州

草色隨驄馬悠悠共出秦水傳  
雲夢曉山接洞庭春帆  
影連三峽猿聲在四隣  
青門一分手難見杜陵人

送友人宰湘陰

從宦舟行遠浮湘又入閩  
蕪葭無朔雁檉枯有蠻神傳  
吏閒調象山精暗訟人惟須  
千樹橘暫救李衡貧

送樂平苗明府

本是求彭澤誰云道里賒  
山從石壁斷江向弋陽斜  
暮色隨楓樹雲陰暗荻花  
諸侯舊調鼎應重宰臣家

送王少府遊河南

馬卿方失意東去謁諸侯  
過宋人應少遊梁客獨愁  
鳥翻千室暮蟬急兩河秋  
僕本無媒者因君淚亦流

贈郭駙馬

青春都尉最風流，二十功成便拜侯。  
金距鬪雞過上苑，玉鞭騎馬出長楸。  
薰香荀令偏憐小，傅粉何郎不解愁。  
日暮吹簫楊柳陌，路人遙指鳳凰樓。

方塘似鏡草芊芊，初月如鉤未上弦。  
新開金埒看調馬，舊賜銅山許鑄錢。  
楊柳入樓吹玉笛，芙蓉出水妬花鈿。

今朝都尉如相顧，願脫長裾逐少年。

舊唐書曰昇平公主賢明有才思大

歷中端等十才子遊暖門下每宴集賦詩公主坐視簾中詩之美者賞百緡端先獻警句薰香荀令云云主即

以百縑賞之錢起以為宿構請以起姓  
為韻復云云暖曰此愈工矣起等始服

送周長史

青楓樹裏宣城郡獨佐諸侯上板橋江客亦能傳好信  
山僧多解說南朝雲陰出浦看帆小草色連天見雁遙  
別有空園落桃杏知將絲組繫蘭橈

感興

香爐最高頂中有高人住日暮下山來月明上山去

溪行逢雨與柳中庸

日落衆山昏蕭蕭暮雨繁那堪兩處宿共聽一聲猿

聽箏

鳴箏金粟柱素手玉房前欲得周郎顧時時誤拂絃


春晚遊鶴林寺寄使府諸公

野寺尋春花已遲背巖惟有三枝明朝攜酒猶堪醉  
為報春風且莫吹

送劉侍郎

幾人同入謝宣城未及酬恩隔死生惟有夜猿知客恨

弋陽溪路第三聲



御定全唐詩錄卷四十二

欽定四庫全書

集部

御定全唐詩錄卷四十三

四

詳校官左中允<sub>臣</sub>璿五珠

主事銜<sub>臣</sub>徐以坤覆勘

總校官原任中允<sub>臣</sub>王燕緒

校對官中書<sub>臣</sub>嵇承志

謄錄監生<sub>臣</sub>胡宗高

欽定四庫全書

御定全唐詩錄卷四十三

顧況

況字通翁蘇州海鹽人長於歌詩性好詼諧雖王  
公之貴亦戲侮之嘗為韓滉節度判官與柳渾李  
泌善渾輔政以校書徵及泌為相自謂當得達官  
稍遷著作郎悒悒不樂求歸坐詩語調謔貶饒州  
司戶參軍後隱居茅山以壽終

皇甫湜撰集序略云吳中山泉氣狀英淑怪麗君  
翁輕清以為性結冷汰以為質煦鮮容以為詞偏  
於逸歌長句駿發踔厲往往若穿天心出月脅意  
外驚人語非尋常所能及最為快也况兼工小筆  
嘗求知新亭鹽監人詰之曰予要貌海中山耳解  
職後落筆果有奇趣

古體詩

築城 築城刺臨戎也寺人臨戎以墓碑為城壁

築城登登于以作固咨爾寺兮發郊外冢墓死而無知  
猶或不可若其有知惟上帝是想

築城奕奕于以固敵咨爾寺兮發郊外冢窟死而無知  
猶或不可若其有知惟上帝是謫

囷 囷哀閩也

囷音寔閩俗呼子為囷呼父為郎  
罷按唐世閩兒出閩中諸道買

獻號為私白事見楊復恭傳 青箱雜記云唐  
世多取閩童為閩奴以進之故况陳其苦以諷  
焉

囷生閩方閩吏得之乃絕其陽為臧為獲致金滿屋為

髡為鉗如視草木天道無知我罹其毒神道無知彼受  
其福郎罷別因吾悔生汝及汝既生人勸不舉不從人  
言果獲是苦因別郎罷心摧血下隔地絕天及至黃泉  
不得在郎罷前

採蠟

採蠟怨奢也荒巖之間有以繡蒙其身腰

藤造險及有羣蜂肆毒哀呼不應則上捨藤而

下沈之壑

採採者蠟於泉谷兮煌煌中堂烈華燭兮新歌善舞絃

柱促兮荒巖之人自取其毒兮

擬古

龍劍昔藏影送雄留其雌人生阻懽會神物亦別離碧  
樹感秋落佳人無還期夜琴為君咽浮雲為君滋愛而  
傷不見星漢徒參差

棄婦詞

古來有棄婦棄婦有歸處今日妾辭君遣妾何處去舊  
家零落盡慟哭來時路憶昔初嫁君聞君甚周旋綺羅

錦繡段有贈黃金千十五許嫁君二十移所天結髮日  
未久離居緬山川家家盡歡樂賤妾空自憐幽閨多沈  
思盛事無十年相思若循環枕席生流泉流泉咽不噪  
獨夢關山道及此見君還君歸妾已老物華惡衰賤新  
寵方妍好掩淚出故房傷心極秋草自妾為君妻君東  
妾在西紅顏到曉恨玉貌一生啼妾有嫁時服輕雲淡  
翠霞瑠璃作斗帳四角金蓮花自從別離後不覺塵埃  
厚常嫌玳瑁孤獨恨梧桐偶玉顏逐霜霰賤妾何能守

寒沼落芙蓉秋風散楊柳以此憔悴顏空將舊物還餘  
生欲有寄誰肯相牽攀君恩既斷絕相見何年月悔傾  
連理杯虛作同心結女蘿附青松貴在相依投浮萍共  
綠水教作若為流不念君棄妾自嘆妾緣薄憶昔初嫁  
君小姑纔倚床今日辭君去小姑如妾長回頭語小姑  
莫嫁如兄夫

華山西岡遊贈隱元叟

羣峰鬱初霽潑黛若鬟沐天風鼓唵呀搖撼千灌木木

葉微墮黃石泉淨停綠危磴蘿薜牽迴步入幽谷我心  
寄青霞世事慚蒼鹿遂令巢許輩于馬謝塵俗想是悠  
悠雲可契去留躅

行路難

君不見古人燒水銀變作北邙山上塵藕絲掛在虛空  
中欲落不落愁殺人睢水英雄多血及建章宮闕成灰  
燼淮王身死桂樹折徐福一去音書絕行路難行路難  
生死有命皆緣天秦王漢武遭不脫汝獨何人學神仙

君不見擔雪塞井空用力吹沙作飯豈堪食一生肝膽  
向人盡相識不如不相識冬青樹上掛凌霄歲晏花凋  
樹不凋凡物各自有根本種禾終不生荳苗行路難行  
路難不知何處是平道中心無事當富貴今日看君顏  
色好

君不見少年頭上如雲髮少壯如雲老如雪豈知灌頂  
有醍醐能使清涼頭不熱呂梁之水挂飛流鼉鼉蛟蜃  
不敢遊少年恃險若平地獨倚長劍凌清秋行路難行

路難昔日少年今已老  
炫目春光不長好  
前朝竹帛事  
皆空日暮牛羊古城草

短歌行有序

情思發動聖賢所不能免也師乙陳其宜延州  
審其音理亂之所經王化之所興也信無逃於  
聲教豈徒文彩之麗遂作此歌

城邊路今人犁田昔人墓  
岸上沙昔時江水今人家  
今人昔人共長歎  
四氣相催節迴換  
明月皎皎入華池  
白日

雲離離度青漢我欲升天天隔霄我欲渡水水無橋我  
欲上山山路險我欲汲井井泉遙越人翠被今何夕獨  
立沙邊江草碧紫燕西飛欲寄書白雲何處蓬萊客  
新繫青絲百尺繩心在君家轆轤上我心皎潔君不知  
轆轤一轉一惆悵何處春風吹曉幕江南淶水通朱閣  
美人二八顏如花泣向春風畏花落臨春風聽春鳥別  
時多見時少愁人一夜不得眠瑤井玉繩相對曉

軒轅黃帝初得仙鼎湖一去三千年周流三十六洞天

洞中日月星辰聯騎龍倒景遊八極軒轅弓劍無人識

東海青童寄消息

以上三首前二首才調集作悲歌分  
為二首後一首集本作攀龍引今參

文苑文粹品

真紀事改正

### 公子行

輕薄兒面如玉紫陌春風纏馬足雙鞵懸金縷鶻飛長  
衫刺雪生犀束綠槐夾道陰初成珊瑚幾節敵紅星紅  
肌拂拂酒光凝當階背拉金吾行朝遊夔夔鼓聲發暮  
遊夔夔鼓聲絕入門不肯自升堂美人扶踏金階月

長安道

長安道人無衣馬無草何不歸來山中老

梁廣畫花歌

王母欲過劉徹家飛瓊夜入雲駟車紫書分付與青鳥  
却向人間求好花上元夫人最小女頭面端正能言語  
手把梁生畫花看凝嚙掩笑心相許心相許為白阿孃  
從嫁與

烏啼曲

玉房掣鎖聲翻葉銀箭添泉霜遠堞畢逋撥刺日銜城  
八九雛飛其母驚此是天上老鷄鳴人間老鷄無此聲  
搖風雜佩耿華燭夜聽羽人彈此曲東方曈曈赤日旭

嵇山道芬上人畫山水歌

鏡湖真僧白道芬不服朱審李將軍墨汁平鋪洞庭水  
筆頭點出蒼梧雲且看八月十五夜月下看山盡如畫  
范山人畫山水歌

山崢嶸水澄泓漫漫汗汗一筆耕一草一木棲神明忽

如空中有物物中有聲復如遠道望鄉客夢遶山川身  
不行

梁司馬畫馬歌

畫精神畫筋骨一團旋風瞥滅沒仰秣如上賀蘭山低  
頭欲飲長城窟此馬昂然獨此羣阿爺是龍飛入雲黃  
沙枯磧無寸草一日行過千里道展處把筆欲描時司  
馬一駒賽傾倒

杜秀才畫立走水牛歌

崑崙兒騎白象時時鎖着獅子項奚奴跨馬不搭鞍立  
走水牛驚漢官江村小兒好誇騎脚踏牛頭上牛領淺  
草平田擦過時大蟲着鈍幾落井杜生知我戀滄洲畫  
作一障張床頭八十老婆拍手笑妬他織女嫁牽牛

李供奉彈箜篌歌

國府樂手彈箜篌赤黃條索金鎔頭早晨有勅駕鴛殿  
夜靜遂歌明月樓起坐可憐能抱撮大拍調絃中指撥  
腕頭花落舞舞製裂手下烏驚飛撥刺珊瑚席一聲一聲

鳴錫錫羅綺屏一絃一絃如撼鈴急彈好遲亦好宜遠  
聽宜近聽左手低右手舉易調移音天賜與大絃似秋  
鴈聯聯度隴關小絃似春燕喃喃向人語手頭疾腕頭  
軟來來去去如風卷聲清泠泠鳴索索垂珠碎玉空中  
落美女爭窺玳瑁簾聖人卷上真珠箔大絃長小絃短  
小絃緊快大絃緩初調鏘鏘似鴛鴦水上弄新聲入深  
似太清仙鶴遊秘館李供奉儀容質身才稍稍六尺一  
在外不曾輒教人內裏聲聲不遣出指剥蔥腕削玉饒

鹽饒瞥五味足弄調人間不識名彈盡天下崛竒曲番  
曲漢曲聲皆好彈着曲髓曲肝腦往往從空入戶來瞥  
瞥隨風落春草草頭只覺風吹入風來草即隨風立草  
亦不知風到來風亦不知聲緩急藝玉燭照銀燈光照  
手實可憎只照箜篌絃上手不照箜篌聲裏能馳鳳闕  
拜鸞殿天子一日一迴見王侯將相五馬迎巧聲一日  
一迴變實可重不惜千金買一弄銀器胡瓶馬上馱瑞  
錦輕羅滿車送此州好手非一國一國東西盡南北除

却天上化下來若向人間實難得

李湖州孺人彈箏歌

武帝當年留法曲淒清掩抑絃柱促上陽宮人怨青苔  
此夜想夫憐碧玉思婦高樓刺壁窺愁猿叫月鸚呼兒  
寸心十指有長短妙入神處無人知獨把梁州凡幾拍  
風沙對面胡秦隔聽中忘却前溪碧醉後猶疑邊草白

鄭女彈箏歌

鄭女八歲能彈箏春風吹落天上聲一聲雍門淚承睫

兩聲赤鯉露鬢鬣三聲白猿臂拓頰鄭女出參丈人時  
落花若斷遊空絲高樓不掩許聲出差殺百舌黃鶯兒

日晚歌

日昏昏兮下山望佳人兮不還花落兮屋上草生兮堦  
間日日兮春風芳非兮欲歇老不可兮更少君胡為兮  
輕別

近體詩

閒居自述

榮辱不關身誰為疎與親  
有山堪結屋無地可容塵  
白髮偏添壽黃花不厭貧  
一樽朝暮醉陶令果何人

洛陽早春

何地避春愁終年憶舊遊  
一家千里外百舌五更頭  
客路偏逢雨鄉山不入樓  
故園桃李月伊水向東流

南歸

老病力難任猶多鏡雪侵  
鱸魚消官况鷗鳥識歸心急  
雨江帆重殘更驛樹深鄉關殊可望  
漸漸入吳音

經廢寺

不知何世界有處似前朝  
石路無人掃松門被火燒  
斷幡猶挂剎故板尚堵橋  
數卷殘經在多年字欲銷

白蘋洲送客

莫信梅花發由來漫報春  
不才充野客扶病送朝臣  
闕下搖清珮洲邊採白蘋  
臨流不痛飲鷗鳥也欺人

春鳥詞送元秀才入京

春來繡羽齊暮向竹林棲  
禁苑銜花出河橋隔樹啼  
尋

聲知去遠顧影念飛低別有無巢鶯猶窺幕上泥

樂府

暖谷春光至宸遊近甸榮雲隨天仗轉風入御簾輕翠  
蓋浮佳氣朱樓倚太清朝臣冠劍退宮女管絃迎細草  
承雕輦繁花入幔城文房開聖藻武衛宿天營玉醴隨  
觴至銅壺逐漏行五星含土德萬姓徹中聲親祀先崇  
典躬推示勸耕國風新正樂農器近銷兵道德關河固  
刑章日月明野人同鳥獸率舞感昇平

寄江南鶴林寺石冰上人

山川重復重心地  
暗相逢忽憶秋  
江月如聞古寺鐘  
湖平南北岸雲抱  
兩三峰  
定力超香象  
真言攝毒龍  
風中何處鶴石上  
幾年松為報  
烟霞道人間  
共不容

送從兄使新羅

六氣銅渾轉三光  
玉律調河宮  
清奉賚海嶽  
晏來朝地  
絕提封入天平  
錫貢饒揚威  
輕破鹵柔服  
恥征遼曙色  
黃金闕寒聲  
白鷺潮樓船  
非習戰  
驄馬是嘉  
招帝女飛

街石鮫人賣淚綃管寧雖不偶徐市儻相邀獨島懸空  
翠孤霞上沈寥蟾蜍同漢月蝓蝓異秦橋水豹橫吹浪  
花鷹迴拂霄晨裝凌莽渺夜泊記招搖幾路通圓嶠何  
山是沃焦颯風晴汨起陰火暝潛燒鬢髮成新髻人參  
長舊苗扶桑銜日近析木帶津遙夢向愁中積魂當別  
處銷臨川思結網見彈欲求鴟共散羲和厯誰差甲子  
朝滄波仗忠信譯語辨謳謠疊鼓鯨鱗隱陰帆鷁首飄  
南溟隨大翼西海飲文鯤指景尋靈草排雲聽洞簫封

侯萬里外未肯後班超

送大理張卿

春色依依傷解攜月卿今夜泊隋堤白沙洲上江離長  
綠樹村邊謝豹啼遷客此來無倚仗故人相去隔雲泥  
越禽惟有南枝分目送孤鴻飛向西

洛陽陌

鶯啼滿御堤堤柳拂絲齊風送名花落香紅襯馬蹄  
珂珮逐鳴騶王孫結伴遊金丸落飛鳥乘興醉青樓

夢後吟

醉中還有夢身外已無心  
明鏡惟知老青山何處深

江上

江清白鳥斜蕩槳  
骨頭花聽唱菱歌  
晚迴塘月照沙

憶都陽舊遊

悠悠南國思  
夜向江南泊  
楚客斷腸時  
月明楓子落

歸山作

心事數莖白髮生涯一片青山  
空林有雪相待古道無

人獨還

宮詞

長樂宮連上苑春  
玉樓金殿艷歌新  
君門一入無由出  
惟有宮鶯得見人

宮詞

禁柳烟中聞曉鳥  
風吹玉漏盡銅壺  
內官先向蓬萊殿  
金合開香瀉御爐

玉階容衛宿千官  
風獵青旂曉仗寒  
侍女先來薦瓊蕊

露漿新下九霄盤

九重天樂降神仙  
步舞分行踏錦筵  
嘈噴一聲鐘鼓歇  
萬人樓下拾金錢

山中

野人愛向山中宿  
况在葛洪丹井西  
庭前有箇長松樹  
夜半子規來上啼

橫山故居

家在雙峰蘭若邊  
一聲秋磬發孤烟  
山連極浦鳥飛盡

月上青林人未眠

臨海所居

此是昔年征戰處曾經永日絕人行  
千家寂寂對流水  
惟有汀洲春草生

此去臨溪不是遙樓中望見赤城標  
不知疊嶂重霞裏  
更有何人度石橋

小孤山

古廟楓林江水邊寒鴉接飯鴈橫天  
大孤山遠小孤出

月照洞庭歸客船

宿昭應

武帝祈靈太乙壇  
新豐樹色繞千官  
那知今夜長生殿  
獨閉空山月影寒

洞庭秋日

青草湖邊日色低  
黃茅嶂裏鷓鴣啼  
丈夫飄泊今如此  
一曲狂歌楚水西

聽角思歸

故園黃葉滿青苔  
夢後城頭曉角哀  
此夜斷腸人不見  
起行殘月影徘徊

山僧蘭若

絕頂茅庵老此生  
寒雲孤木伴經行  
世人那得知幽徑  
遙向青峰禮磬聲

望簡寂觀

青嶂青溪直復斜  
白雞白犬到人家  
仙人住在最高處  
向晚春泉流白花

夜中望仙觀

日暮銜花飛鳥還  
月明溪上見青山  
遙知玉女牕前樹  
不是仙人不得攀

題葉道士山房

水邊楊柳赤欄橋  
洞裏神仙碧玉簫  
近得麻姑書信否  
潯陽江上不通潮

送李秀才入京

五湖秋葉滿行船  
八月靈槎欲上天  
君入長安予適越

獨登秦望望秦川

聽劉安唱歌

子夜新聲何處傳  
悲翁更憶太平年  
即今法曲無人唱  
已逐霓裳飛上天

王郎中妓席

玉作搔頭金步搖  
高張苦調響連宵  
欲知寫盡相思夢  
度水尋雲不用橋

汗浥新粧畫不成  
絲催急節舞衣輕  
落花遶樹疑無影

回雪從風暗有情

秦聲楚調怨無窮  
隴水胡笳咽復通  
莫遣黃鶯花裏轉  
參差撥亂妬春風

和宮女題紅葉

愁見鶯啼柳絮飛  
上陽宮女斷腸時  
君恩不禁東流水  
葉上題詩寄與誰

戎昱

昱荆南人登進士第  
衛伯玉辟從事建中中為辰

虔二州刺史

紀事云憲宗朝北狄頻寇邊大臣奏議古者和親有五利而無千金之費帝曰比聞有士子能為詩而姓名稍僻是誰宰相對以包子虛冷朝陽皆非也帝遂吟曰山上青松陌上塵雲泥豈合得相親世路盡嫌良馬瘦惟君不棄卧龍貧千金未必能移性一諾從來許殺身莫道書生無感激寸心還是報恩人侍臣對曰此是戎昱詩也帝悅曰朕又

記得詠史一篇云漢家青史內計拙是和親笑曰  
魏絳之功何其懦也大臣遂息和戎之論矣

古體詩

塞上曲

城上畫角哀即知兵心苦試問左右人無言淚如雨何  
意休明時終年事鞞鼓

從軍行

昔從李都尉雙鞞照馬啼擒生黑山北殺敵黃雲西太

白沈鹵地邊草復萋萋歸來邯鄲市百尺青樓梯感激  
重然諾平生膽力齊芳筵暮歌發艷粉輕鬟低半酣秋  
風起鐵騎門前嘶遠戍報烽火孤城嚴鼓鼙揮鞭望塵  
去少婦莫含啼

中秋感懷

八月更漏長愁人起常早閉門寂無事滿院生秋草昨  
宵北窓夢夢入荆南道遠客歸去來在家貧亦好

晚次荆江

孤舟大江水水涉無昏曙雨暗迷津時雲生望鄉處漁  
翁閒自樂樵客紛多慮秋色湖山上歸心日邊樹徒稱  
竹箭美未得楓林趣向夕垂釣還吾從落潮去

湖南雪中留別

草草還草草湖東別離早何處愁殺人歸鞍雪中道出  
門迷轍跡雲水白浩浩明日武陵西相思鬢堪老

客堂秋夕

隔窓螢影滅復流北風微雨虛堂秋蟲聲竟夜引鄉淚

蟋蟀何知人自愁四時不得一日樂以此方知客遊惡  
寂寂江城無所聞梧桐葉上偏蕭索

聽杜山人彈胡笳

綠琴胡笳誰妙彈山人杜陵董庭蘭董君少與山人友  
山人別來今已久當時海內求知音囑付胡笳入君手  
杜陵工琴四十年琴聲在音不在弦座中為我奏此曲  
滿堂蕭瑟如窮邊第一第二拍淚盡蛾眉沒蕃客更聞  
出塞入塞聲穹廬羶帳難為情彌天雨雪四時下五月

不曾芳草生須臾促軫變宮徵一聲悲兮一聲喜南看  
漢月雙眼明却顧胡雛寸心死回鶻數年收洛陽洛陽  
士女皆驅將豈無父母與兄弟聞此哀情皆斷腸杜陵  
先生證此道沈家祝家皆絕倒如今世上雅風衰若箇  
深知此聲好世上愛箏不愛琴誰明此調難知音今朝  
促軫為君奏不向俗流傳此心

近體詩

採蓮曲

雖聽採蓮曲詎識採蓮心  
漾檝愛花遠回船愁浪深  
煙生極浦色日落半江陰  
同侶憐波靜看粧墮玉簪

古意

女伴朝來說知君欲棄捐  
懶梳明鏡下羞到畫堂前  
有淚沾脂粉無情理管絃  
不知將巧笑更遣向誰憐

詠史

漢家青史上計拙是和親  
社稷依明主安危托婦人  
豈能將玉貌便擬靜胡塵  
地下千年骨誰為輔佐臣

閨春宴花溪嚴侍御莊

一團春翠色云是子陵家山帶新晴雨溪流閨月花瓶  
開巾漉酒地拆笋抽芽綵縵承顏服朝朝奏白華

桂州臘夜

坐到三更盡歸仍萬里賒雪聲偏傍竹寒夢不離家曉  
角分殘漏孤燈落碎花二年隨驃騎辛苦向天涯

送嚴十五之長安

送客身為客思家愴到家暫收雙眼淚遙想五陵花路

遠征車迴山迴劍閣斜長安君到日春色未應賒

送張秀才之長沙

君向長沙去長沙僕舊諳雖云桂嶺北終是洞庭南山  
靄生朝雨江烟作夕嵐松醪能醉客慎勿滯湘潭

聞笛

一作李益詩

入夜思歸切笛聲寒更哀愁人不願聽自到枕前來風  
起塞雲斷夜深關月開平明獨惆悵飛盡一庭梅

江城秋霽

霽後江城風景涼，豈堪登眺只堪傷。  
遠天蟬竦收殘雨，映水鷓鴣近夕陽。  
萬事無成空過日，十年多難未還鄉。  
不知何處銷茲恨，轉覺愁隨夜夜長。

採蓮曲

潯陽女兒花滿頭，毵毵同泛木蘭舟。  
秋風日暮南湖裏，爭唱菱歌不肯休。

塞上曲

漢將歸來朔塞空，旌旗初下玉關東。  
高蹄戰馬三千匹，

落日平原秋草中

早春雪中

陰陰萬里晝漫漫  
愁坐關心事幾般  
為報春風休下雪  
柳條初放不禁寒

移家別湖上亭

好去春風湖上亭  
柳條藤蔓繫離情  
黃鸝久住渾相識  
欲別頻啼四五聲

征人歸鄉

三月江城柳絮飛五年遊客送人歸  
故將別淚和鄉淚今日闌干濕汝衣

出軍

龍繞旌竿獸滿旗翻營乍似雪山移  
中軍一隊三千騎盡是并州遊俠兒

旅次寄湖南張郎中

寒江近戶慢流聲竹影臨窓亂月明  
歸夢不知湖水濶夜來還到洛陽城

寄許鍊師

掃石焚香禮碧空，露華偏溼蕊珠宮。  
如何說得天壇上，萬里無雲月正中。

送妓赴于公召

寶鈿香蛾翡翠裙，粧成掩泣欲行雲。  
殷勤好取襄王意

莫向陽臺夢使君

雲溪友議云于頔鎮襄陽，豈為屬城中客有來自豈所言，豈妓善歌者，頔

遽命召之，豈不得已遣行賦，此什及至，令唱歌，妓唱此頔聞不安，歎曰：大丈夫豈有奪人所愛為己懽娛者乎！  
贈之歸，手書謝豈太平廣記以名妓為韓  
況又以前好去春風湖上亭為送妓詩

包何

何字幼嗣融之子與弟佶齊名世稱二包天寶七  
載登進士第大厯中為起居舍人

近體詩

送李侍君赴泉州

傍海皆荒服分符重漢臣  
雲山百越路市井十洲人  
執玉來朝遠還珠入貢頻  
連年不見雪到處即行春

送王文宰江陰

郡北乘流去花間竟日行海魚朝滿市江鳥夜喧城止  
酒非關病援琴不在聲應緣五斗米數日滯淵明

寄楊侍御

一官何幸得同時十載無媒獨見遺今日不論腰下組  
請君看取鬢邊絲

包佶

佶字幼正天寶六載登進士第累官諫議大夫坐  
善元載貶嶺南劉晏奏起為汴東兩稅使晏罷以

信充諸道鹽鐵輕貨賤物使有名於時遷刑部侍郎改秘書監封丹陽郡公

近體詩

秋日過徐氏園林

回塘分越水古樹積吳烟掃竹催鋪席垂蘿待繫船鳥窺新罽粟龜上半歌蓮屢入忘歸地長嗟俗事牽

雙山逢信公所居

遙禮前朝塔微聞後夜鐘人間第四祖雲裏一雙峰積

雪封苔徑多年亞石松傳心不傳法誰可繼高蹤

對酒贈故人

扶起離披菊霜輕喜重開醉中驚老去笑裏覺愁來月  
送人無盡風吹浪不迴感時將有寄詩思溢難裁

元日觀百僚朝會

萬國賀唐堯清晨會百僚花冠蕭相府繡服霍嫖姚壽  
色凝丹檻歡聲徹九霄御鑪分獸炭仙管弄雲韶日照  
金觴動風吹玉佩搖都城獻賦者不得共趨朝

酬于侍郎湖南見寄十四韻

桂嶺千崖斷湘流一派通  
長沙今賈傳東海舊于公  
章甫經殊俗離騷繼雅風  
金閨文作字玉匣氣成虹  
翰墨時招侶丹青夙在公  
主恩留左掖人望積南宮  
巧拙循名異浮沈顧位同  
九遷歸上畧三已愬愚衷  
責謝庭中吏悲寬塞上翁  
楚材欣有適燕石愧無功  
山曉重嵐外林春苦霧中  
雪花翻海鶴波影倒江楓  
去札頻逢信迴帆早挂空  
避賢方有日非敢愛微躬

奉和常閣老晚秋集賢院即事寄贈徐薛二侍郎  
秘殿掖垣西書樓苑樹齊秋煙凝縹帙曉色上璇題門  
接承明近池連太液低疎鐘文馬駐繁葉綵禽棲職美  
綸將綉榮深組及珪九霄偏眷顧三事早提攜對案臨  
青玉窺書捧紫泥始歡新遇重還惜舊遊暎左宦登吳  
岫分家渡越溪賦中頻歎鵬卜處幾聽雞望闕應多戀  
臨津不用迷栢梁思和曲朝夕候金閨

送日本國聘賀使晁巨卿東歸

上才生下國東海是西隣九譯蕃君使千年聖主臣野  
情偏得禮木性本含仁錦帆乘風轉金裝照地新孤城  
開蜃閣曉日上車輪早識來朝歲塗山玉帛均

再過金陵

玉樹歌終王氣收雁行高送石城秋江山不管興亡事  
一任斜陽伴客愁

李嘉祐

嘉祐字從一趙州人天寶七年擢第授秘書正字

後謫令鄱江調江陰又嘗入為中臺郎上元中出  
為台州刺史大厯中復為元州刺史嘉祐與嚴維  
劉長卿冷朝陽諸人友善為詩麗婉有齊梁風

近體詩

奉陪韋潤州遊鶴林寺

野寺江城近雙旌五馬過禪心超忍辱梵語問多羅松  
竹閒僧老雲烟晚日和寒塘歸路轉清磬隔微波

春日淇上作

淇水春來漲鴛鴦  
逐浪飛清明桑葉小  
度雨杏花稀衛  
女紅粧薄玉孫白馬肥  
相將踏青去不解惜羅衣

仲夏江陰官舍寄裴明府

萬室邊江次孤城對海安  
朝霞晴作雨濕氣晚生寒  
苔色侵衣桁潮痕上井欄  
題詩招茂宰思爾欲辭官

送上官侍御赴黔中

莫向黔中路令人到欲迷  
水聲巫峽裏山色夜郎西  
樹隔朝雲合猿窺曉月啼  
南方饒翠羽知爾飲清溪

送王牧往吉州謁王使君

細草綠汀洲  
王孫奈薄遊  
年華初冠帶  
文體舊弓裘  
野渡花爭發  
春塘水亂流  
使君憐小阮  
應念倚門愁

自蘇臺至望亭驛人家盡空春物增思悵然有作  
因寄從弟紆

南浦菰蔣覆  
白蘋東吳黎庶逐  
黃巾野棠自發空流水  
江燕初歸不見人  
遠樹依依如送客  
平田渺渺獨傷春  
那堪回首長洲苑  
烽火年年報塞塵

宋州東登望題武陵驛

梁宋人稀鳥自啼登艦一望倍含悽  
白骨半隨河水去黃雲猶傍郡城低  
平陂戰地花空落舊苑春田草未齊  
明主頻移虎符守幾時行縣向黔黎

暮春宜陽郡齋愁坐忽聞枉劉七侍御新詩因以  
酬答

子規夜夜啼楮葉遠道逢春半是愁  
芳草伴人還易老落花隨水亦東流  
山臨睥睨恒多雨地接瀟湘畏及秋

唯羨君為周柱史，手持黃紙到滄洲。

赴南巴留別褚七少府

種田南郭傍春陂，萬緒無情把釣絲。  
綠竹放侵行徑裏，青山常對捲簾時。  
紛紛花落門空閉，寂寂鶯啼日更遲。  
從此別君千萬里，白雲流水憶佳期。

送朱中舍遊江東

孤城郭外送王孫，越水吳洲共爾論。  
野寺山邊斜有徑，漁家竹裏半開門。  
青楓獨映搖前浦，白鷺閒飛過遠村。

若到西陵征戰處不堪秋草自傷魂

### 常袞

袞京兆人天寶末進士累官翰林學士中書舍人  
文章俊拔為當時推重代宗朝拜門下侍郎同平  
章事建中初罷為福建觀察閩人知學袞教之始  
也

### 近體詩

奉和聖製麟德殿燕百寮應制

雲闕御筵張山呼聖壽長玉闌豐瑞草金陛立神羊台  
鼎資庖膳天星奉酒漿蠻夷陪作位犀象舞成行網已  
祛三面歌因守四方千秋不可極花發滿宮香

晚秋集賢院即事寄徐薛二侍郎

穆穆上清居沈沈中秘書金鋪深內殿石甃淨寒渠花  
樹臺斜倚空煙閣半虛縹囊披錦繡翠軸卷瓊琚墨潤  
冰文蘼香銷蠹字魚翻黃桐葉老吐白桂花初舊德雙  
遊處聯芳十載餘北朝榮庾薛西漢盛嚴徐侍講親華

展微吟步綺疏綴簾金翡翠賜硯玉蟾蜍序秩東南遠  
離憂歲月除承明期重入江海意何如

欽定四庫全書

御定全唐詩錄  
卷四十三

御定全唐詩錄卷四十三